

## Allannguutissatut siunnersuut

## uunga

**Uunga siunnersuut: Aningaasarsianit akileraarutit pillugit Inatsisartut inatsisaata allanngortinneqarneranik Inatsisartut inatsisaat nr. xx, xx 2012-imeersoq**

Aappassaaneerlugu oqaluuserineqarnissaanut Naalakkersuisunit saqqummiunneqartoq.

**§ 1**

**1.** Inatsisissatut siunnersuummi nr. 4 imatut allassimassaaq:

”4. § 22, imm. 2, nr. 4-mi allassimasoq ”100.000 koruuniuppata” allanngortissaaq imaalillugu: ”50.000 koruuniuppata””.

**2.** Inatsisissatut siunnersuummi nr. 5 imatut allassimassaaq:

”5 § 23 imatut oqaaasertaqassaaq:

”§ 23. Inuk, § 1, imm. 1, nr. 1 aamma 2 naapertorlugit akileraartussaataasooq, imaluunniit § 2 malillugu killilimmik akileraartussaataasooq namminersorluni inuussutissarsiornermik ingerlataqarnermini isertitaqartoq, pigisat § 24, imm. 1, nr. 1 naapertorlugu, akileraartarnermi nalikilliliinerit il.il. pillugit nalunaarummi nalikillilerneqarsinnaasutut taasanik, annertunerpaamik imm. 2-mi taaneqartut nalikillilerneqarsinnaasut annertoqataannik akileraarutitigut nalikilliliisinaavoq.

*Imm. 2.* Ukiunut ataasiakkaanut akileraarutitigut nalikilliliinerit annertunerpaamik nalinut ukununnga naapertuutissapput:

1) Illuutit atortullu ikkussorneqarsimasut pissarsiarineranni nalingisa ukiumut 5 procentii angullugit nalikillilerneqarsinnaapput.

2) Umiarsuit timmisartullu pissarsiarineranni nalingisa ukiumut 10 procentii angullugit nalikillilerneqarsinnaapput.

3) Nalikillilerneqarsinnaasunut allanut aningaasartuutit il.il. aammalu ingerlatsinermut atorut, pequtit pissarsiarineranni nalingi aammalu pigisanut piffissami killilimmi pisinnaatitaaffinnut akiliutinut il.il. 30 procentii angullugit nalikillilerneqarsinnaapput, ukiup aningaasarsiorfiusup naanerani pigisap nalikillilerneqarsinnaasup nalinganit tunngaveqartumik.

4) Pigisanut nalilinnut nr. 3-mi taaneqartunut aningaasartuutit imaluunniit pissarsiarineranni nali 100.000 koruuniuppata taakkualuunniit ataallugit naleqarpata 100 procentii angullugit nalikillilerneqarsinnaapput.

*Imm. 3.* Namminersorluni inuussutissarsiornermik ingerlataqartut imm. 1-mi taaneqartut nalikillilerneqarsinnaasunut aningaasartuutinik aammalu pigisanut nalilinnut il.il. imm. 2, nr. 3-mi 4-milu taaneqartunut kontomik ataatsimut naatsorsuiffiusussamik naatsorsuuteqassapput. Ukiumi nalikilliliissutit ukiup aningaasarsiorfiusup naanerani nalikillilerneqarsinnaasup nalinga tunngavigalugu nalikilliliissutigineqartassapput. Nalusoq taanna ukiup aallartinnerani

naliusup nakilliliissutaasinnaasutut aningaasartuutunik imaluunniit ingerlatsinermut atortut il.il. pissarsiarinerani nalinginik ilallugit naatsorsorneqartassapput, taakkua ukiumi aningaasarsiorfiusumi pissarsiarineqarsimappata, aammalu ukiumi ingerlatsinermut atortut il.il. ukiumi aningaasarsiorfiusumi tuninerini nalinginik kiisalu imm. 2, nr. 4 naapertorlugu nalikilliliissutaasunik ilanngaateqartillugit. Pitsanngorsaatinut aningaasartuutit pissarsinermi naliusutut suliarineqartassapput. Ukiup aallartinnerani naliusoq tassaavoq ingerlatsinermut atortut il.il. ukiumi siusinnerusuni pissarsiarinerisa nalingi aammalu aningaasartuutit nalikilliliissutunik ilanngareerlugit nalingat.

*Imm. 4.* imm. 2, nr. 3-mi aamma 4-mi pigisanik taaneqartunik tunisinikkut naliusut nalikilliliissutigineqarsinnaasup sinnera qimmussimappassuk, nikingassut naatsorsugaq ukiumi aningaasarsiorfiusumi tassani isertitatut ilanngunneqassaaq.””

**3. Inatsisissatut siunnersuummi § 2 imatut oqaasertaqassaaq:**

## ”§ 2

Inatsisartut inatsisaat 15. december 2012-imiit atuutilissaaq ukiorlu aningaasarsiorfiusoq 2013 aallarnerfigalugu sunniuteqalissalluni, takuulli imm. 2.

*Imm. 2.* Inatsisissatut siunnersuummi nr. 3 aamma 4 ukioq aningaasarsiorfiusoq 2012 aallarnerfigalugu atuutilerput. Ukiumut aningaasarsiorfiusumut 2012-imut, aningaasarsianit akileraarutit pillugit inatsimmi § 22, imm. 2 naapertorlugu nalikilliliissutaasut katinnerannut, selskabip, akileraarutit ilanngaatigitinnagit sinneqartoorutaasa akileraaruteqaataasussat 25 procentiinut naapertuuttut qaavatigut ilassutigisinnavaai, aatsaalli aningaasarsianit akileraarutit pillugit inatsimmi § 22, imm. 2 aamma 5 malillugit nalikilliliisogaareerneratigut. Ukiumi aningaasarsiorfiusumi 2012-imi § 22, imm. 2, nr. 4-mi nalikilliliissutaasinnaasutut killiussaq 75.000 koruuniuvoq. Selskabinut il.il., ukiumik kippingasumik aningaasarsiorfeqartunut, piffissaq naatsorsuorsiorfik 31. august 2012-imut siusinnerusumiluunniit killeqarpat, inatsit sunniuteqartumik aatsaat atuutilissaaq ukioq aningaasarsiorfik 2013 aallarnerfigalugu.”

Siunnersuummut oqaaseqaatit

### **Oqaaseqaatit nalinginnaasut**

Akileraarusersuinerup allanngortinneqarnissaa pillugu partiit Naalakkersuisuutitaqartut aamma Naalakkersuisut akornanni oqalliseqatigiinnerup kingunerisaanik allannguutissatut siunner-suusiortoqarpoq.

Allannguutissamat siunnersuutip kinguneriissavaa selskabit 50.000 koruunit angullugit nalilinnik ukiup ingerlanerani pigisanik pisiarineqarsimasut, pisiamik nalingi tamakkerlugit akileraarutitigut nalikilliliissutigisinnaaneritut periarfissaqartinneqassasut. Ukiumili aningaasarsiorfiusumi 2012-imi killiussaq taanna 75.000 koruuninut angissusilerneqarnissaa siunnersuutigineqarpoq.

Namminersorlutik inuussutissarsiornermik ingerlataqartut allannguutissatut siunnersuutip kingunerisaanik 100.000 koruunit angullugit nalilinnik ukiup ingerlanerani pigisanik pisiarineqarsimasut, pisiamik nalingi tamakkerlugit akileraarutitigut nalikilliliissutigisinnaaneritut periarfissaqartinneqassasut. Namminersorlutik inuussutissarsiornermik ingerlataqartunut taamatut qaffasinnerusumik nalikilliliissuteqarsinnaanermik periarfissiineq pissuteqarpoq, selskabit, selskabit akileraarutissaat iluanaarutisiassallu akileraarutissaat pillugit maleruagassanik tungaveqartumik sinneqartoorutit akileraaruteqaatiginissaasa kinguartinneqarnissaanut namminersorlutik inuussutissarsiornermik ingerlataqartunit periarfissarissaarnerunerat.

Tamakku saniatigut allanngutissatut siunnersuut aaqqissugaanermigut allannguutininik imaqqarpoq.

Allanngutissatut siunnersuutip kingunerissavaa, akileraarutitigut nalikilliliisinnaanerup allanngortinneqarnerisa kingunerisassaanik, siunissaq ungasinnerusoq eqqarsaatigalugu, isertitanut tamarmiusunut siunnersuutip sunniutissa ukiumut 1 mio. koruuninik appassasoq 20 mio. koruuninngorluni.

### **Aalajangersakkanut ataasiakkaanut oqaaseqaatit**

Nr. 1-imut

Siunnersuutigineqarpoq selskabit 50.000 koruunit angullugit nalilinnik ukiup ingerlanerani pigisanik pisiarineqarsimasut, pisiamik nalingi tamakkerlugit akileraarutitigut nalikilliliissutigisinnaassagaat.

*Nr. 2-mut*

Siunnersuutigineqarpoq namminersorlutik inuussutissarsiornermik ingerlataqartut 100.000 koruunit angullugit nalilinnik ukiup ingerlanerani pigisanik pisiarinqarsimasut, pisiamik nalingi tamakkerlugit akileraarutigut nalikilliliissutigisinnaassagaat.

Siunnersuutip aqqissugaaneranut naqqiissutissatut siunnersuutigineqarpoq siunnersuummi § 23, imm. 3 aamma 4-mut siunnersuummi innersuussinermi ”imm. 2” ivertinneqassasoq.

*Nr. 3-mut*

Nr. 1-itut aamma 2-tut allannguutissatut siunnersuutit kingunerisaannik, inatsisissap atuutlernissaanut piffissaliussap naleqqussarnissaa siunnersuutigineqarpoq.

Ilutigalugu siunnersuutigineqarpoq ukiumi aningaasarsiorfiusumi 2012-imi selskabit ukiup ingerlanerani pigisanik pisiarinqarsimasut, pisiamik nalingi tamakkerlugit akileraarutigut nalikilliliissutigisinnaaneranut killigititaq 75.000 koruuninut angissusilerneqassasoq.